

## **Eth secrèt dera caisha de sabates**

Hège pògui dies que sa pairin de Roger auie mòrt, mès, encara que lo trapaue fòrça de mens e ère un shinhau trist, Roger non podec deishar de sénter un baticòr fòrça especiau quan sabec que sa pairin auie deishat entà eth un present fòrça particular: ua caisha de sabates, laguens i trapèc ues fòtos antiques, endrabades damb papèr vegetau. Ua fòto deth besavi, qu'auie estat fotograf; ua fòto deth pairin, qu'auie estat arquitecte, e ua de sa pair mainatjon.

A Roger li hec arrir, veir a sa pair tan petit!

Laguens dera caisha tanben i auie ues sabates antiques qu'auien ua istòria fòrça polida: sa pairin les portaue eth dia que coneishec sa mairia ena hèsta major e barèren per prumèr còp ... Sa pairin baraue coma un os e la cauciguèc tres viatges, totun, sa mairia se'n enamorèc.

Laguens d'ua d'aqueres sabates, Roger i trapèc un plan secret damb fòrça diboishi misteriosi. Roger non entenie ce de qué ère aqueth plan mès sabie qu'es plans secrets tostemp te pòrten tà un tresaur.

Sense pèrder ne ua minuta, Roger decidic seguir es instruccions deth plan, pas a pas, entà descurbir eth tresaur amagat.

Era prumèra causa que hec siguec pintar era caisha de color nere per laguens. Tota ben nera! com era gargamèla deth lop. Ce per qué eth plan li hège pintar ua caisha de sabates de color nere? non ac sabie, mès s'auie prepausat descurbí'c! Ara seguida, braquèc ua hièstra ath miei d'ua cara estreta dera caisha. Ua hièstra petita, coma era deth plan. Dempús placèc un caperader deth iogort ben net, ben lecat dessus dera hièstra, enganchat damb cinta adesiva. E horadèc eth caperader d'iogort damb ua esplinga, en miei, pr'amor que i passèsse un petit rai de lum.

Roger non auie ne idia de ce qué hège, mès seguie totes es instruccions a plec. Qué en gesserie, de tot aquerò? e s'ère ua badinada de sa pairin?

Sa pairin tostemp li hège badinades e s'inventaue istòries. Ère fòrça particular, sa pairin es sabates que li auie deishat en eretatge, sonque se les auie metut dus viatges en tota era sua vida: eth dia que coneishec sa mairia e eth dia en qué se maridèren.

De contunh, Roger retalhèc era auta cara estreta dera caisha e en hec un marc. I enganchèc dessus un requadre de papèr vegetau en tot profiter era engolòpa qu'embolicaue es fòtos. Mès non paraue de preguntar-se tota era estona fòrça intrigat:

- Qué ei açò que hèsqi? Entà que servirà?

Mès entà sabé'c auie d'arribar enquiara fin.

Roger tornèc a guardar eth plan damb atencion. Ath moment entenec ce de qué anaue era causa auie de méter eth marc damb eth papèr vegetau en miei dera caisha. E ac hec ...

Eth plan non didie arren mès, totun Roger non sabie ce qué hèr-ne, d'aquera anticalha.

Se i siguesse sa pairin, l'ac demanarie. Mès non i ère e Roger s'auie d'escarravilhar tot solet.

E ara seguida barrèc era caisha damb eth caperader. Hèt! ja auie acabat.

Roger s'abaishèc e guardèc era caisha pera cara estreta que quedaue dubèrta, era qu'auie retalhat e subitament. Quina causa mès extraordinària!. Vedec es sabates de sa pairin projectades laguens dera caisha, deth revés!

Es sabates èren dessús dera taula, dauant dera caisha, e era sua imatge entraue peth horadet deth caperader d'iogort e se projectaue dessús deth papèr vegetau!



Auie seguit eth plan pas a pas e ara fin auie trapat eth sòn tresaur, ua caisha entà atrapar imatges!

Siguec sa pair de Roger, qui li expliquèc qu'era sua caisha d'atrapar imatges ère ua cramba escura, ua invencion fòrça antica que dempús servic entà inventar era fotografia.

Quan hec dètz-e-ueit ans, Roger decidic hèr-se fotograf e era prumèra causa que fotografièc sigueren es sabates de sa pair-sénher.

A Roger li shautaue plan hèr fòtos pr'amor qu'auie era sensacion qu'arturauen eth temps e pr'amor que totemp que en hège ua ère com s'eth sòn pair-sénher encara siguesse damb eth.

*Guidon d'Enric Gomà*



© CCRTV Interactiva, S.A. | Televisió de Catalunya, S.A.

- [Avís legal](#) |
- [Segell de qualitat](#) |
- [Contacta 54€0](#) |
- - [Idiomes](#)
    - [Català](#)
    - [Castellano](#)
    - [English](#)